

Ny Valosoa sy hadihady

Fitsinjaram-pahefana sy fanapariaham-pitantanana Lasa tompo-menakely tsy refesi-mandidy ireo governoran'ny Faritra

Tena mbola ao anatin'ny hamehana ara-pahasalamana marina isika, ka mitantana ny Firenena amin'ny alàlan'ny didim-panjakana izao fitondrana izao. Maro loatra ny fanitsakitsahana ny Lalàmpanorenana nataon'ity fitondrana ity ary mitohy izany hatramin'izao, ka manao izay tiany atao ireo nampindramina fahefana ireo. Efa tsy ara-dalàna ny nanomezana anarana "governora" izay tsy maintsy voafidim-bahoaka ary "Lehiben'ny Faritra", no iantsoana azy araka ny Lalàmpanorenana ihany koa. Vonjimaika ihany, hono, ny niantsoana ireo ho "governora" hoy ny Fitsarana Avo momba ny Lalàmpanorenana teo aloha. Mbola nanamafy anefa ity andrim-panjakana ity, fa tokony ho natao haingana ny fifidianana, ny tsy ampy kanefa tena zava-dehibe dia ny tsy namerana ny fepotoana iasan'ireto governoran'ireto, hany ka miitatra toy ny sima misioka na ny fahefana omena azy na ny fotoana iasany. Vao tamin'ny herinandro lasa iny, nandritra ny fivorian'ny filankevitry ny minisitry, dia nampitomboina indray ny fahefan'ny governoran'. Tsara ho fantatra fa ao anatin'ny vondrom-bahoaka itsinjaram-pahefana (Collectivité territoriale décentralisée) ny Faritra ary voafaritry mazava tsara ny andraikitra ny ambaratongam-pitantanana ao anatin'izany. Tsy eken'ny lalàna ny fifanitsahan'andraikitra ity rafitra ity amin'ny an'ny fanaparitaham-pitantanana (Comité Technique décentralisé) toy ireo sampan-draharahan'ny minisitry an'ny amin'ny Faritra na Faritany. Ny didim-panjakana nivoaka tamin'ny fivorian'ny filankevitry ny minisitry farany anefa dia mampifangaro ireo andraikitra sy fahefana ireo, ka ny governoran'ny no lasa mibaiko ny eo anivon'ny vondrom-bahoaka itsinjaram-pahefana sy ny fanaparitaham-pitantanana. Araka izany dia toa lasa faritra mizaka tena (région autonome) no mijoro ankehitriny, ka toa maka tahaka ny faritany mizaka tena (province autonome) tamin'ny 2002 no ataon'izao fitondrana izao, na toy ny nataon'ny mpanjanaka tamin'ny fanjanahantany. Manaporofy izany ny ataon'ireo governoran'ny izay tena manjakazaka tokoa ary midehaka fa ny fahefana nomen'ny filohan'ny Repoblika azy no hampihariny izay toa midika ihany koa fa tompomenakely izy ireny. Tsy mazava intsony na anisan'ny vondrom-bahoaka itsinjaram-pahefana na ao anatin'ny fanaparitaham-pitantanana no misy ny

governor, ka ny vahaolana amin'izao toe-draharaha izao dia ny fanatanterahana ny fifidianana ny lehibe sy ny filankevitry ny Faritra na manova sy mifidy Lalàmpanorenana vaovao mifanaraka amin'izany lalantsaina izany. Niverina avy namonjy ny fivoriana an-tampon'ny SADC ny filohan'ny Repolika kanefa tsy nisy fantatry ny Malagasy izay voandàlana nentiny avy any, fa tonga dia nihazo an'i Toamasina izy nijery ny fandroson'ny asa "Miami". Lasa any Parisy indray hamonjy ny fivorian'ny mpandraharaha, izany hoe handresy lahatra ireo mpisehatra eo amin'ny fampiasam-bola hampiasa izany eto Madagasikara, kanefa ny sisintany mbola mikatona, mbola mihàtra ny hamehana ara-pahasalamana ary fantatry ny any ivelany fa tsy misy loatra, na azo lazaina fa tsy misy mihitsy ny antoka eo amin'ny fampiasam-bola eto, satria ny orinasa malagasy aza potehina rehefa tsy mety amin'ny mpitondra ny firehana ara-politikan'ny tompon'ny orinasa. Angamba azon'ny mpitondra hatao ny mampanantena raha toa ka azony antoka, fa misy kopaka isasahana amin'izany. Ireo orinasa vahiny miasa eto mantsy dia mikaikaika tokoa amin'ny fitakiana vola ataon'ny fitondrana aminy. Ny mpandraharaha malagasy torak'izany, satria hampiakarina izay tsy izy ny hetra kanefa ny orinasa tsy mihodina araka ny tokony ho izy, ka voatery mampiato ara-teknika ny mpiasa ny tompon'ny orinasa. Mahalasa saina tokoa ny nandan'ny depiote vitsy, azo nisaina amin'ny rantsan-tàna ilay "fonds souverain", izay tsy misy manao izany eran-tany raha tsy ireo firenena manana ambim-bava eo amin'ny harinkarena. Maizina tanteraka araka izany ny fiavian'ny vola hamatsina ity tetibola ho an'ny fiadidiana ny Repoblika ity, satria lazaina fa entina manatanteraka ny tetikasan'ny filohan'ny Repoblika izany vola izany. Tsy ny habetsahan'ny delegasiona nandeha any amin'ny renivohitr'i Frantsa no milaza inona, fa fantatry ny mpandraharaha any ivelany ny toe-draharaha misy eto Madagasikara, ka azo antoka fa tsy hisy ho sahy hanao vy very ny volany amin'izany. Mety hanana fihetsehampo halahelo noho ny raharaha "Apollo 21" angamba ny vazaha, ka mety ho avy handray anjara amin'ny fampivoarana ny fiainam-pirenena eo amin'ny sehatra misy, ny ampitso no hamaly izany.


Andry Tsiavalona

Préfet de police an'Antananarivo sy Vazahabe Mikasa hanala mpanolotsainan'ny tanàna miisa 10

Mpanolotsainan'ny tanànan'Antananarivo miisa 10 amin'izao fotoana no kasain'ny Préfet de police an'Antananarivo, ny jeneraly Ravelonarivo Angelo, sy ny ben'ny tanàna Vazahabe : Naina Andriantsitohaina ho esorina. Nandefa taratasy ho an'ny filohan'ny fitsarana misahana ny ady amin'ny fanjakana : Tribunal Administratif, ny Préfet de police ny tanànan'Antananarivo, mangataka ny fanesorana sy ny fanoloana mpanolotsainan'ny tanàna miisa 10 ny tenany. Anisan'izany ny mpanolotsaina Toavina Ralambomahay (Komba), Clémentence Raharinirina (IRK) ary mpanolotsaina TIM miisa 8.

Tsy fanatrehana fivoriana in-telo misesy no voalaza, fa anton'izao fanapahan-kevitra izao. Arak'izany, tsy ny fampandrosoana ny tanànan'Antananarivo no maha-maika ny kaominina Antananarivo Renivohitra (CUA), fa fanalana mpanolotsaina izao. Izany hoe: izay tsy mitovy hevitra na sahy mitsikera ny zavatra tsy mety ataon'i Vazahabeny izany dia tsy sasatra no torian'izy ireo ary tonga amin'izao fangatahana fanalana mpanolotsaina izao, izay marihana fa voafidim-bahoaka. Handrasana ny tohin'ity raharaha ity, satria inoana, fa tsy hanaiky mora an'izao fanesorana azy ireo izao, ireto mpanolotsaina lanim-bahoaka ireto.

Stefa



Ny fitoriana nalefan'ny Préfet de police an'Antananarivo, any amin'ny fitsarana misahana ny ady amin'ny fanjakana.

FITSIDIHAN-DRAJOELINA ANY FRANTSA

Diaspora fôpla no naseho

Mitsidika ny any Frantsa amin'izao fotoana ny filoha Andry Rajoelina, hanatrika ny fahaonana eo amin'ny mpandraharaha avy amin'ny tany miteny Frantsay, sy ireo mpan-draharaha any Frantsa mivondrona ao amin'ny MEDEF: Mouvement des Entreprises de France. Voalaza fa hisy ihany koa ny fahaonany amin'ireo Malagasy monina any ivelany, na dispora Malagasy any an-toerana. Raha ny diaspora nasehon'izy ireo an-tsary tamin'ny tambazotran-tse-rasera sosialy ny faran'ny herinandro teo araka ny nambaran'ireo Malagasy tena mipetraka any ivelany, tsy Malagasy tena monina any an-dafy ireo naseho an-tsary, fa diaspora fôpla, tsy tena izy araka ny fitenin-jatovo, voalaza fa staff, na ireo mpiara-miasa amin'ny fi-

loha, sy ny tale misahana ny tetikasan'ny filohan-pirenena avy aty an-tanindrazana izy ireo. Mami-ta- tena ny filoha sy ny mpiara-dia aminy, hoy ireo diaspora miara-dia amin'ny mpanohitra any ivelany na ny RMDM dispora. Matahotra ny tena

diaspora ihany koa ny fitondrana, satria nambaran'izy ireo fa efa feno ny toerana, amin'ny ho fihononana amin-dRajoelina amin'ity herinandro ity. Ankoatra izany, ambaran'izy ireo, fa gaboraraka ny fivoahana an'i Madagasikara, satria mbola

mikatona ny sisintany amin'izao fotoana, nefa ahoana ny mpitondra sy ny mpiara-dia aminy, afaka mivoaka marobe toy izao, fa ny maro an'isa ihany no feheziny izy ireo eto.

Niaina



Diaspora fôpla, hoy ireo Malagasy monina any ivelany, miara-dia amin'ny mpanohitra aty Madagasikara na RMDM dispora.

TONONKALO

Aiza izay hoe fitsitsiana ?

Aiza ho aiza izany izao ilay politikam-pitsitsiana ? (Ny eny ambony, tsy modely ny amin'izay atao rehetra !)
Ny vahoaka hatrany ve no hilanja ny hazo fijaliana, lanareo dia tsy hihafy fa vao mainka koa hiletra ?

Izao "ny atao" sy "ny tenenina", mifanohitra eny foana. (Ny vahoaka anie tsy adala fa ny teninao tadidiny !)
Fidedahana hatrany no andaniana ny fotoana ?
Tena fako ve zahay ka dia atao tsy misy vidiny ?

Aiza ho aiza izany izao ilay politikam-pitsitsiana, Raha nanendry ireo minisitry izay voalaza ho mahay? Mahagaga mantsy ny isany fa vao mainka koa nampiana. Sa rehefa voky ireo dia mba handrezatra izahay ?

Ny manara-penitrao dia teny fandaniam-potoana. (Toy ny tsy ao an-dapa ianao fa mbola an-trano fandihezana!)
Tsy salegy no ilaina, handroso mihemotra eny foana.
Mila vatsy, mila tohana ireo vahoaka f'efa vizana!

Androna mpitondra angamba raha ny omaly sy ny anio, Ka dia miliba ianao, mandany, tsy misaina izay ho farany!
Saingy raha ny ampitso kosa dia tsy anao fa tadidio, Ireo nampahantrana mantsy mbola manana ny hambarany !

IRINA HO TAFITA (19-08-21)